



ALTERNATIV DEMOKRATESCH  
REFORMPARTEI

Groupe parlementaire

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 14. Mee 2020

Här President,

Sou wéi d'Chambersreglement et virgesäit, bieden ech lech, dës parlamentaresch Fro un d'Madamm Ëmweltminister an un den Här Ausseminister weiderzeleeden.

D'Madamm Ëmweltminister huet den 12. Mee op enger Pressekonferenz, an dono och an der Chamber déi belsch Regierung kritiséiert, well an der Belsch eng Etüd iwwer méiglech Plaze fir d'Endlagerung vu laangfristeg aktiven an héich toxeschen nuklearen Offäll gemaach gëtt. D'Madamm Dieschbourg kritiséiert, am Besonneschen, datt e puer vun deene Sitten, déi theoretisch kéinten a Fro kommen, an der Géigend vun der Lëtzebuenger Grenz sinn an datt op d'mannst eng vun deene potentiell betraffene geologesche Formationen bis an de Groussherzogtum era reecht.


Déi Fro ass u sech net nei. Scho bei där eestëmmeger Ratifizéierung vum bilateralen Ofkommen mat der Belsch de 15. Mee 2018 an der Chamber, ass d'Fro no engem Endlager an der Belsch gestallt ginn (*Projet de loi (7177) portant approbation de l'accord entre le Grand-Duché de Luxembourg et le Royaume de Belgique relatif à la gestion et au stockage définitif des déchets radioactifs du Grand-Duché de Luxembourg sur le territoire du Royaume de Belgique, fait à Gëichel le 4 juillet 2016*).

An dem Kontext wéilt ech der Regierung dës Froe stellen:

1. Déi belsch Ministesch fir Ëmwelt, d'Madamm Marie Christine Marghem, huet d'Aussoe vun der Madamm Dieschbourg als "graven, diplomateschen Incident" duergestallt. Dëst ënner anerem dowéinst, well d'Madamm Dieschbourg verschidde Behauptungen an der Ëffentlechkeet gemaach huet, ouni am viraus mat de kompetente, federalen Autoritéiten an der Belsch Kontakt ze hunn. Wéi stellt sech déi lëtzebuergesch Regierung zu deenen Aussoe vun engem belsche Regierungsmember?
2. Lëtzebuerg deckt, no Aussoe vun der Regierung, eppes méi wéi 10% vu sengem aktuelle Stromverbrauch mat Strom aus Nuklearkraaftwierker of. Wéi vill kënn dovun aus belschen Atomkraaftwierker?

3. Well jo Lëtzebuerg selwer Atomstroum importéiert a verbraucht, also indirekt och Atomoffall produzéiert, huet et dann net och eng, op d'mannst moralesch, Matverantwortung fir de nuklearen Offall a seng laangfristeg Stockéierung?
4. Lëtzebuerg ass un d'Direktiv 2011/70/Euratom gebonnen, déi bestëmmt, datt kee Staat sech däerf der Verantwortung fir seng eegen nuklear Offäll entzéien. Wann d'Belsch de bilateralen Accord iwwe d'Stockéiere vun deene lëtzebuergeschen, nuklearen Offäll sollt kënnegen, wéi eng Alternativen hätt eist Land dann?
5. Well Lëtzebuerg selwer souwuel direkt wéi och indirekt nuklearen Offall produzéiert an den direkt produzéierten an d'Belsch exportéiert an de bilateralen Accord vum 4. Juli 2016 keng geographesch Dispositiounen virgesäit, ausser datt den Offall muss definitiv op belschem Territoire gelagert ginn a belschem Recht ënnerläit, wéi justifiéiert sech eng Argumentatioun, wéi déi vun der Madamm Dieschbourg, déi u sech en eventuelle Risiko vun der Endlagerung vun eise Grenze wëll wech halen an en domat eleng op eis belsch Nopere wëll ofwälzen?

Mat déiwem Respekt,



Fernand Kartheiser  
Deputéierten